

FJALA E DEPUTETES HATIXHE KONOMI

E ENJTE DATA 16 MARS 2023

E nderuar zonja Kryetare,

Të nderuar kolegë,

Sot po diskutojmë projektligjin “Për bletarinë”, objekt i të cilit është përcaktimi i rregullave për ushtrimin e aktivitetit të bletarisë, si veprimtari me interes jetësor, kombëtar, e dobishme për ruajtjen e mjedisit natyror, ekosistemit dhe bujqësisë. Pra, për herë të parë sektori i bletarisë na vjen sot me një kuadër të rregulluar ligjor, i cili përcakton rregullat për mbarështimin e bletëve, transportin, shtegtimin, riprodhimin e tyre, si dhe përpunimin, etiketimin, magazinimin dhe tregtimin e produkteve të bletarisë. Gjithashtu, projektligji përforcon rregullat e gjurmueshmërisë dhe u shton vlerë produkteve të bletarisë. Bletët janë insekte shumë të rëndësishme për jetën në planetin tonë. Me aktivitetin e tyre ato kontribuojnë në të gjithë zinxhirin tonë ushqimor, pasi ndërmjet tyre kryhet pjalmimi dhe bletët kontribuojnë në ripërtëritjen e natyrës dhe në ruajtjen e ekosistemit. Ekspertë të fushës bëjnë thirrje për të ruajtur bletët, si një aset mjaft i rëndësishëm i jetës. Humbja e bletëve çdo vit dhe trajtimi jo i mirë i tyre për një sërë arsyesh bëjnë që kjo çështje të kthehet në një shqetësim për shumë vende anë e mbanë globit, ndaj gjithnjë e më tepër shtohen thirrjet dhe bëhet apel për ta ruajtur këtë insekt.

Sektori i bletarisë është kontribues i rëndësishëm në sigurimin e rezervave ushqimore. Bletaria është, gjithashtu, një sektor i rëndësishëm i bujqësisë që shërben si një burim prodhimesh natyrale me vlerë të lartë ushqimore dhe mjekësore. Jo më kot Asambleja e Përgjithshme e Kombeve të Bashkuara e shpalli 20 majin si Ditën Botërore të Bletëve, me qëllim sensibilizimin e opinionit publik për rëndësinë e këtyre pjalmuesve, për kërcënimet me të cilat ato përballen, si dhe kontributin e tyre për zhvillimin e qëndrueshëm. Vitet e fundit sektori i bletarisë në vend ka marrë një vëmendje të veçantë, si me skemat e vazhdueshme të subvencionimit, ashtu edhe me mbështetje dhe trajnime të vazhdueshme për bletarët. Kapaciteti prodhues në vend ka ardhur duke u rritur. Nga viti 2013 e këtej ka pasur një dyfishim të kapacitetit të prodhimit, tregues tepër i mirë për komunitetin e bletarëve, të cilët prej vitesh e kanë kërkuar këtë kuadër rregullator. Më në fund, sot mund të themi se e kemi përmbushur premtimin për këtë komunitet prej 12 mijë bletarësh, ku rreth 3 mijë prej tyre kanë mbi 50 koshere. Kjo nismë do t’i japë fund mungesës së monitorimit të bletës, shtegtimeve të pakontrolluara, si dhe trajtimit pa kriter të sëmundjeve të tyre, me pasojë humbjen e kolonive të bletëve. Gjithashtu, ky ligj parashikon masa administrative, kur aktiviteti ushtrohet në informalitet, duke mos e raportuar atë, kur nuk zotërohet certifikatë e gjendjes shëndetësore të bletëve apo kur nuk njoftohen inspektorët, në rastet e dyshimeve për sëmundje me karakter përhapës. Ky ligj do të ndikojë, gjithashtu, në zgjerimin e sektorit të bletarisë, si dhe do të rrisë konkurrueshmërinë e tij. Hartimi i këtij projektligji erdhi si një kërkesë e vazhdueshme e Federatës së Bletërritësve të Shqipërisë dhe e shoqatave lokale. Jo më larg se dje, në një takim që zhvillova me disa anëtarë të shoqatës së bletarëve të qarkut të Beratit mora edhe një herë mbështetjen dhe entuziazmin e tyre, që më në fund puna dhe angazhimi i tyre po merr formalizimin e kërkuar prej kohësh, mbrojtjen, si dhe mbështetjen e nevojshme për mbarëvajtjen e një pune aq delikate dhe aq të rëndësishme, jo vetëm në këndvështrimin ekonomik,

por edhe për vetë jetën në tokë. Vëmendja kushtuar këtij sektori ndër vite po kulmon sot me miratimin e këtij projektligji, u shprehën 10 anëtarë gjatë takimit, dhe pa diskutim kjo na gëzon të gjithëve. Ndër të tjera bletarët shprehin edhe kërkesën për projekte në mbrojtje të bletës autoktone, si dhe për mbështetje në transportin e koshereve. Të nderuar kolegë, Për sa më sipër, ju ftoj të gjithëve ta mbështesim këtë projektligj! Faleminderit!